

# Xroon yuxin tsikjin ndo Pablo xruen en ndo sen ste tjajna Tesalónica

<sup>1</sup> \*Jan an, Pablo, ndo Silvano ko ndo Timoteo xruan anna xroon ngajinnta ja anta kichuuna ni ngo tjajna Tesalónica ti steniinta Ndotáina Dio ko Ncháina Jesucristo.

<sup>2</sup> Ndotáina Dio ko Ncháina Jesucristo, sintanchaonnta ndo ko xrotjáanta ndo juaxruxin.

*Ndo Dio sinchéña ndo ijie ti xrokjan ndo Cristo*

<sup>3</sup> Kichuuna, kain nchakon xrokonda tsajonna juasiaina ixi ja anta ngajin ndo Dio. Me e tikinixin sinta ana, ixi ja anta kain nchakon ícha chuntianta Ncháina ko ícha tjue e kichuunta.

<sup>4</sup> Méxin jan anna jian nichjana ixi ja anta ngajin sen kichuuna, sen ningue ndo Dio, ixi juaxruxin stena ixi ja anta ícha soji chuntianta Ncháina Jesús, maski stetatsinganta juachjaon ixi jii chujni ningakon annta.

<sup>5</sup> Ji i tjako ixi nduaxin ndo Dio jian nchéña ndo ijie ngajinnta ixi juachjaon stetatsinganta, me e xrondachro ixi tikinixin tsixin innta ti tetuan an ndo Dio.

<sup>6</sup> Kaxon ndo Dio sinchéña ndo ijie ngajin ni ndako a junta anta; je e na tsayé e na ijie juachjaon.

<sup>7</sup> Ko ja anta ti xrastechondanta juachjaon, tsjoka anta xranchi jan anna. Jaña tson en

nchakon tsj̄ x̄in Ncháina Jesús ngajní ko ngusine xro i tsonoxin ndo ko tsika o ndo kain sen ángel, sen chónnda juachaxin.

<sup>8</sup> Tsij̄ ndo Jesucristo ixi sinchéña ndo ijie ngajin kain chujni kuitikaon a ndo Dio ni ko kuitikaon a chijni jian nichja Ncháina Jesucristo.

<sup>9</sup> Chujni ji i ijie juachjaon ko tangi tsikon n̄ kain nchakon ko nai a tsjexin ti tsikaon n̄, ko je e ndo tsengi ndo n̄ satsji n̄ ntá a ko ítsikon a n̄ ti ijie juachaxin chónnda ndo.

<sup>10</sup> Jaña tson en nchakon tsij̄ Ncháina Jesús ixi kain sen tjúá aséen ko kain sen kuitikaon chijnie ndo, sen me e tsajon sen juasaya\* ngajin ndo ko kao ja anta ixi kuitikaonnta ti nichjana.

<sup>11</sup> Méxin, kain nchakon tjancha ana ndo Dio ixi jian tsake enta xranchi tikinixin tsake e sen kuinche e ndo; ko tsingijnanta ndo ixi nduaxin tsjachanta sinche enta kain ixr̄a jian tjaunnta sinche enta ixi chuntianta ndo.

<sup>12</sup> Jaña ja anta tsajonnta kain juasaya ngajin Ncháina Jesucristo ko kaxon je e ndo jian xronichja ndo ixi ja anta ixi titikaonnta ndo. Jaña tson en ixi juachaxien ndo Dio ko Ncháina Jesucristo ixi tsango jian ndo.

## 2

### *Tsonoxin xi ña i*

<sup>1</sup> \*Jai kichuuna, xronichjana ixi nchakon tsij̄ Ncháina Jesucristo ko tsetanna ndo, tinóatán̄ana ngajinnta

---

\* **1:10 juasaya** respeto, honor      **2:1** 1Ts. 4:15-17.

<sup>2</sup> Ixi tindoxin anta chijni jian kuaye enta ko ó kuitikaonnta, ko tintue anta ixi ngixeko chujni xrondachro ixi ó juexin kuitja nchakon tsij Ncháina Jesús, ko tien anta ni ndachro ixi kuayé e na naa xroon xranchi naa xroon xruan an jan anna ti xrondachro ixi ó kujj nchakon me e.

<sup>3</sup> Tintue anta ixi xro an chujni sintaya anta jaña, ixi nchakon tsij Ncháina Jesucristo xrokonda sa ó itsjé chujni tsetoka o kichuu na xroningakon en na ndo Dio, ko tsonoxin naa xi tsango ña i, xi me e xrokonda tsitjáña xa.

<sup>4</sup> Xi ji i, xi ningakon en kain nge e ne e ndo Dio, xroxraon xa ixi ícha chóna xa juachaxin ixi ndo Dio ko kain nge e tikinixin en ndo, ko xi me e tsjacha xa tsake e xa ngaxin in ningue ndo Dio ko xrondachro xa ixi je e xa ndo Dio xa.

<sup>5</sup> ¿Á xraon anta ixi jan an ó ntatjunta nchakon bake e ngajinnta ixi jaña xrokon en?

<sup>6</sup> Ko jai ja anta ó no anta nge e tingakon en ixi xrati a nchakon tsonoxin xi me e.

<sup>7</sup> Ko kain ti ña i ó imao jiton en. Je o titjáña satsji ngisen jitingakon en xa.

<sup>8</sup> Tjume e xiña i tsonoxin xa ko Ncháina Jesús ixi chrinto tsachrjexin ro a ndo tsóñaxin ndo xa, ko jaña tsitjáña xa ixi chjiixro ijié tsika o ndo Jesús tsoenxin ji i.

<sup>9</sup> \*Ko xiña i me e tsika o xa ijié juachaxin tsajon Xixron anxrée, ko me e tsjakoxin xa ixi sinchexruen en xa chujni ko ikaxin ixra ijié sinche e xa, kain ji i je a nduaxin, je o sincheye e xa chujni.

<sup>10</sup> Ko kain chijni ña i sincheyexin xa kain chujni tikinixin tsitjáña ixi ni me e tjaun a na kuitikaon

na chijnie ndo Dio, chijni tingijna tsachrjengí e na ijie ko tsechón na kain nchakon.

<sup>11</sup> Méxin, ndo Dio tsintu e ndo na tsitikaon na kain nge e nduaxin a ko kain juancheya tsin en na.

<sup>12</sup> Ko jaña tsama na ijie kain ni kuitikaon a chijni nduaxin ixi ícha juinche e na juaxruxin kain ti ndako a tjako Xixron anxrée.

### *Sen kuinche e ndo me e sen tsechón*

<sup>13</sup> Kichuuna jan anna kain nchakon xrokonda tsajonna juasianana ixi ja anta ngajin ndo Dio. Ko Ncháina Jesús tjua anta ndo ixi ndo Dio kuincha anta ndo, ixi je e ndo xraxrangíxixión kuincha anta ndo ixi xrokomé e jíanta ko jaña tsarichonnta kain nchakon, ixi juasie Ncháina Jesús ko Espíritue ndo tsingijna tsontjúá asáanta ixi chuntianta chijnie ndo.

<sup>14</sup> Je e ndo Dio kuiya anta ndo ixi xrochondanta juachaxin tsarichonnta kain nchakon ixi kuitikaonnta chijnie ndo, chijni juako ananta. Jaña tsaye enta juachaxin tajon Ncháina Jesucristo.

<sup>15</sup> Méxin, kichuuna, soji take énta, ko tjáña inta chijni juentakuan anntana nchakon bake ena ngajinnta ko ti chronga xroon kjin annanta.

<sup>16</sup> Ncháina Jesucristo ko Ndotáina Dio jian ndo ixi tjaunna ndo, ko tajon ndo juachaxin ixi juaxruxin tsake e aséejina ko xrochuntiana ixi kain nchakon tsojuna ngajin ndo.

<sup>17</sup> Ko je e ndo sinchesoji ndo asáanta ko jaña soji tsake enta kain nchakon, ko je e ndo tsajon ndo juachaxin ixi xronichjanta ti nduaxin ko sinche enta kain ixra jian.

### 3

#### *Tjanche enta ndo Dio ixi jan anna*

<sup>1</sup> Ko jai tjancha ananta, nichje enta ndo Dio tsingijnana ndo ixi kain tjajna ngata a nunte taka tsayé e nã chijnie Ncháina, ko chujni ji i jian tsayé e nã chijni ngaya aséen nã, xranchi kon en ngajinnta.

<sup>2</sup> Ko kaxon tjanche enta ndo Dio ixi tsingijnanana ndo ixi ni ningakon en chijni jian, tsingakóna ina nã ixi ste kaxin ni chúntia i Ncháina Jesucristo.

<sup>3</sup> Ko Ncháina nduaxin jian ndo, je e ndo tsingijnanta ndo ixi soji tsake enta, ko je e ndo tsintue a ndo ixi xiña i sinta anta xa xrojan nge e.

<sup>4</sup> Ko jan anna chuntiana ixi Ncháina tsingijnanta ndo ixi stenche enta ko sinche enta kain ti jian xranchi kuetuan annanta.

<sup>5</sup> Ko Ncháina tsingijnanta ndo xrotjue enta chujni xranchi je e ndo juakoxin ndo tjaunna ndo, ko tsingijnanta ndo Cristo ixi soji tsinteenta maski tangi tsatsinganta.

#### *Sen titikaon ndo Cristo xrokonda sinche e sen ixra*

<sup>6</sup> Kichuuna, tetuan ananta ixi juachaxien Ncháina Jesucristo, tjento anta íkaxin sen kichuuna, sen tjaun a nche e ixra ko nche a sen xranchi juntakuan annanta.

<sup>7</sup> Ja anta ó no anta xranchi sinche enta ti juako ananta nchakon bake ena ngajinnta, ixi jan anna nai a kuintu ana junta ana ixra.

<sup>8</sup> Ko kain nchakon juengana nã ti juinena. Ko junta ana ixra tiie, nchakon ixi jaña kuajondaxin ana ixra ngajinnta ixi ti sinena.

9 Maski kuachondana juachaxin xro-juanchia ananta xrobingijnananta, ko junta ina jaña. Jan anna junta ana ixrā ixi jaña juako ananta xranchi sinche enta.

10 Méxin, nchakon bake ena ngajinnta kuetuan annanta ixi: Ngisen tjaun a sinche e ixrā, sine a sen.

11 Ó konónana ixi kaxin ja anta nche anta ixrā, ko tjikekonta nge e ti konda inta ko nche anta xrā.

12 Méxin, ni me e ntatjanna nā ixi juachaxien Ncháina Jesucristo ixi xrokonda sinche e nā ixrā tsjachaxin nā ti sine nā.

13 Ko ja anta, kichuuna, tonchrje anta nche enta ti jian.

14 Ko siá xrojan ngisen titikaon a nge e ikjinna ngaya xroon ji i, tsje enta jian ngisen me e, ko tjeto anta sen ixi jaña tsosue e sen.

15 Ko ningakuen anta sen me e. Cháña nichje enta sen xranchi naa sen kichuunta ixi í sinche a sen jaña.

### *Juexin nichja ndo Pablo*

16 Ko Ncháina, ndo tajon juaxruxin, je e ndo tsajon ndo juaxruxin ngajinnta kain nchakon ko je e ndo tayakon annta ndo kainnta.

17 Jan an Pablo, tjána kjinxin juajna ji i. Jaña tsatsuan xinnta kain xroon ikjin jan an.

18 Ncháina Jesucristo sintanchaonnta ndo kainnta ixi juachaxien ndo. Jaña tson en.

**Chijnie ndo Jesucristo  
Popoloca, San Luís Temalacayuca: Chijnie ndo  
Jesucristo New Testament**

copyright © 2016 Wycliffe Bible Translators, Inc.

Language: Popoloca, San Luís Temalacayuca

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source files  
dated 29 Jan 2022

ee37a138-f1b9-51ef-b60f-e89d6de4d06f